

太古集序

癸巳之夏余自大梁北遷至銅臺聞天平有道士范公大師道價甚高且好賢喜士爲東州冠四方游士多往依之師皆振卹不厭遂欲一識之而未能也已而余還鄉里凡二年丙申歲南游聞其名益甚因至東原得一拜下風具言議宏深曾懷灑落飄飄然非塵土中人余驚且服遂館於其宮踰兩旬相與之意甚厚將別出一編書曰此予師郝崑崙太古歌詩今將重鈔不以傳子當爲我序余受而讀之則已有馮丈內翰題其首因紬繹再四歎曰是亦古之有道者歟何其言之精而理之妙也嘗謂士大夫生而爲學則曰吾欲兼善天下致君澤民然志不與道藏輯要

太古集序

三

胃集八

時偕鮮克遂所願幽憂憤志反自傷其身者多矣所謂兼善不能而獨善又失深可歎嗟彼方外之士初無濟時心則決然修鍊惟以壽命爲事精專篤慎其功日新雖不能白日飛昇亦保體完神康強終世與夫逐逐於外物爲虛名所劫持耗智剝精而無補吾教者相去亦遠矣若今郝公幼而立志挺挺不衰其塊處數年有玉潔松剛之操一旦談玄論易神解心融著書立言傳於身後而范公能發揚其師之道使大振於時而又刊定遺文以開悟晚學俱爲方外偉人故余有激而書以警吾儕之兩失者云是秋八月渾水劉祁序